

INUIT ATAQATIGIIT

INATSISARTUNI



Nuuk 19. april 2013

Inatsisartut Suleriaasianni § 37 naapertorlugu matumuuna Naalakkersuisunut imaattunik apeqquteqaateqarpunga:

(Inatsisartuni ilaasortaq, Naaja Nathanielsen, Inuit Ataqatigiit)

- 1) **Nukissiorfik aktiaateqarluni ingerlatseqatigiiffingortinneqarpat Naalakkersuisut qanoq iliuuseqarlutik nuna tamakkerlugu atuisut imermik, sarfamik kiassarnermillu pilersorneqarnissaat qulakkeerniarpaat? Kalaallit Nunaanni inoqarfiit tarmik pilersorneqarsinnaaqqullugit ingerlatseqatigiiffik pilersuisussaataa-nermik pisussaaffilerneqassava? Ingerlatseqatigiiffik sarfamik, imermik kiassarsinna-nermillu innuttaasunut tamarmiusunut pilersuisussaatinneqassappat, tamanna nalinginnaasumik aktiaateqarluni ingerlatseqatigiiffiit namminersorlutik tullerii-aaralutik ingerlatsisinnaanerannut qanoq tulluussorineqarpa?**
- 2) **Naalakkersuisut qanoq iliuuseqarniarpat aktiaateqarluni ingerlatseqatigiiffik Nukissiorfiit aalajangerpat atuisuminnit akit tunisassiorneq tunngavigalugu pilersinneqartut aallaavigalugit (akit piviusut) akiliisitsisalerniarpat? Akit piviusut tunngavigalugit atuisut akiliisinneqartassanngippata, taava kikkut ullumikkut akit nammaqatigiinneq tunngavigalugu appasitsinneqarnerinut matussusiisalissappat? Aningaasartuutaalersussat ingerlatseqatigiiffingortup nammineq aningaasaataa-nit imaluunniit nunatta karsianit sullissinermi isumaqatigiissuteqarnikkut matus-suserniarneqassappat?**
- 3) **Aalisakkerinermik tunisassiorfiit ullumikkut ukiumut 90 mio. koruunit missaanik sarfamik imermillu atuinerminnut akikillisaaffigineqartarput. Aktiaateqarluni ingerlatseqatigiiffiup Nukissiorfiit tapiissuteqartarnerup taassuma peerneqarnis-saa aalajangiuppagu Naalakkersuisut tamanna akuerilersaarpaat? Taamaan-gippat ingerlatseqatigiiffiup aningaasaataanit tamanna imaluunniit nunatta karsianit Nukissiorfiit A/S-imut sullissinermik isumaqatigiissuseqarnikkut anin-gaasalersorneqassava?**
- 4) **Nukissiorfinnut tapiissutaasartup 2019-ip tungaanut ukiumut 10 mio. koruuninik millisarneqartarnissaanik pilersaarutigineqareersoq Naalakkersuisunit attatiin-narniarneqarpa?**
- 5) **Nukissiorfiit nunatta karsianut isumalluuteqarunnaartut attaveqarunnaartullu nammineerlutik erniakinnerusumik nunani allani attartorsinnaanerannik Naalak-kersuisut upperinninnerat sunik tunngaveqarpa?**

Tunngavilersuut

Naalakkersuisut suleqatigiinnissaminnut isumaqatigiissutaanni atuarneqarsinnaavoq Nukissiorfiit aktiaateqarluni ingerlatseqatigiiffingortinniarneqassasoq. Maanna ingerlat-seriaatsimi akinillu pilersitsinermi atuisut akornanni nammaqatigiinneq tunngaviuvoq, taamaalillunilu Nuummi Sisimiunilu atuisut kiisalu nunatta karsiata tapiissuteqartar-tarnerisigut sinerissap sinnerani, illoqarfinni nunaqarfinnilu atuisunut akit tamanut naammaginartut akigitinneqartarput.

Akit pilersinneqartarneranni nammaqatigiinnerup attattuarnissaa aalajangiusimaneqarnissaalu Inuit Ataqtigiinnut pingaarutilerujussuuvoq. Nukissiorfik aktiaateqarluni ingerlatseqatigiiffingortinneqarnissaa siusinnerusukkut siunnersuutigineqaraangat taamaammat aamma akerliusarsimavugut. Missingersuusionerit takutereerpat akit tunisassiornermi tunngaviusut atuutsinneqassappata, tamanna assersuutigalugu Oqaatsuni 1 kilo watt-imut akit koruuninik qulingiluanik akisunerulernerannik kinguneqassasoq. Inuit Ataqtigiinniit isumaqarpugut naammaginantumik akeqartitsineq kiisalu nunamut tamarmut tutsuiginarnerusumik pilersuisinnaaneq qulakkeerneqassasoq Nukissiorfiit imminut suliffeqarfittut aquttuuppat taamaalillunilu aktiaateqarluni ingerlatseqatigiiffingortinneqanngippat.

Ernummatigaara Naalakkersuisut pilersaarutaata kingunerissagaa innuttaasut Nuummi Sisimiunilu najugaqanngitsut pilersorneqarnerminnut akiliinerusalissasut. Innuttaasut sinnerissap sinneraniittut naammaginantumik nammaqatigiinnermillu tunngaveqartumik akiliisariaqarnerat eqqarsaatigigaanni, tamassuma saniatigut ernummatigaara Nukissiorfiit aktiaateqarluni ingerlatseqatigiiffingortinneqaruni sipaarutaasut sullissinissamut isumaqatigiissusionerermi aningaasartuutaajumaartussanit ikinnerussasut.

Aktiaateqarluni ingerlatseqatigiiffik tutsuiginartumik ingerlanneqartup qulakkeertussaavaa pigisami nalillit imminut akilersinnaasumik ingerlanneqarnissaat, minnerpaamillu ajunaarutaanngitsumik ingerlanneqarnissaa. Nukissiorfiit aktiaateqarluni ingerlatseqatigiiffingortinneqarpata tamanna innuttaasut imermut, sarfamut kiassarnermullu akiliutigisartagaannut annertuumik kinguneqarnerluttussaavoq - akit naammaginantumik inissisimatinniarlugit Nukissiorfiit Namminersorlutik Oqartussallu akornanni sullissinissamik isumaqatigissusiortoqanngippat.

2009-mi Attaveqatigiinnermut Avatangiisinullu Naalakkersuisoqarfiup Nukissiorfik aktiaateqarluni ingerlatseqatigiiffingortinneqassagaluarpat tamanna qanoq kinguneqassanersoq pillugu kikkunnulluunniit attuumassuteqanngitsunut misissortippaa. Misissuinerit Ernst-consulting-ip suliarai, tassanilu manna atuarneqarsinnaavoq: "akit allanngortinnagit naammaginantumik ingerlatsinermi sinneqartooruteqarnissaq pilersinneqarsinnaanngilaq, taamaaliornikkullu tutsuiginassuseqartumik pigisat akiitsullu naligiissarneqarnerat sanarfineqarsinnaanatik". Taamaalilluni ersarissisinnearpoq Nukissiorfiit aktiaateqarluni ingerlatseqatigiiffittut imminut akilersinnaasutut ingerlanneqassappata, taava akit tunisassiorneq tunngavigalugu pilersinneqartut aallaavigalugit (akit piviusut) akilersuisitsisariaqassasoq taamaalillunilu siusinnerusukkut nammaqatigiinneq tunngaviusoq qimanneqartariaqassaluni.

Ullumi Namminersorlutik Oqartussat Nukissiorfiit sinnerlugit aningaasanik attartortarpoq, attartukkallu Nukissiorfimmit nunatta karsianut akilersorneqartarput. Namminersorlutik Oqartussat attartornerminni atugassarititaasut pitsaannerusut pissarsiarisinnaavaat. Nukissiorfiit nunatta karsia avaqqullugu siunissami aningaasanik atorniartalissagaluaruni, attartorniarneq akisunerulissaaq, akiliisussatuallu tassaapput atuisut.

Apeqqutinnut akissuteqaatit tassaappata nammaqatigiinneq ingerlatiinnarniarneqartooq tapiissuteqartarnerlu assignngitsutigulluunniit ingerlatiinnarniarneqarluni, Nukissiorfillu sinnerlugu nunatta karsia aningaasanik attartorniartartuussasoq, taava Nukissiorfiit suli aktiaateqarluni ingerlatseqatigiiffingortinniarneqarnera paasiuminaalligaluttuinnassaaq.